

ÎLE-À-LA-CROSSE L'IKOL MAMOUWIYAWUK WIYASHWAWCHIKAYWIN

WEESTAMAKAYWIN OUSCHI KAKWAYCHIKAYMOOWIN POOR KAYSCHINAHOUWIN PO PAKITINIKAWTAYNANIWAN NAGRIMAWN

**Keeshpin kiya keema payyek toon famee li mambr kay-itouhtayw Île-à-la-Crosse
Itaykawweekihk/Daw Misyoon L'ikol, madoon amistaw ooma weestamakaywin payahtik
akouz muwnayshkam tee drway.**

For English, pour français, ohci nehiyawewin, Denesųłne yatı ʔa:
info@ILEXSettlement.ca | 1-833-700-7458

Ooma wiyashwawchikaywin si aykwawnima mawhti ooki Li Gouvarnimaw di Kenadaw pi Saskatchewan kischee rispoonsabl poor mawytoutawkouwina aykwawnima lee zhawn'd ikol pi see famee mambr kakwawtakishtaw akouz kaw-itouhtaychik itay Île-à-la-Crosse Itaykawweekihk L'ikol (ashkaw shinihkawtayw Île-à-la-Crosse Daw Misyoon L'ikol, Île-à-la-Crosse itay kawweekihk l'ikol, keema pikou ooma "Île-à-la-Crosse L'ikol").

Ihtakwan pakitinikawtaynaniwan lee nagrimawn avek tou lee deu Kenadaw pi Saskatchewan aykwawnima takoowawn en payimawn kaw-tipahikawtayk ouschi itahtow Li Gouvarnimaw kayschiwawk ishi lee zhawn'd ikol, avek meena kootak en payimawn tapishkoot Nakatamakaywin aen Tawd d'arzhawn, kiko chi-outishouwak lee zhawn'd ikol, see famee mambr, pi see alawntour.

Oohin kaw-pakitinikawtaynaniwan aykwawnihi itayistamouwina maykwawt. Nama kaykwy si li bout pi namou en payimawn chi-tipahikawtayw keeshpin pikou li zheuzh keemiyayhtem pakitinikawtaynaniwan. Keeshpin awa li zheuzh keemiyayhtem pakitinikawtaynaniwan avek payyek pikou Li Gouvarnimaw, chi-pounistem wiyashwawchikaywin pakwatem aykwawnima Li Gouvarnimaw. Keeshpin awa li zheuzh keemiyayhtem tou lee deu kaw-pakitinikawtaynaniwan, chi-pounistakwan kahkiyaw wiyashwawchikaywin.

Kahkiyaw ooma weestamakaywin weestamawinawn:

- ayiwawk ouschi ooma mamouwiyawuk wiyashwawchikaywin
- kaykwy ashtayw daw pakitinikawtaynaniwan
- tawnsheeshi li zheuzh chi-itayistam keeshpin keemiyayhtem pakitinikawtaynaniwan
- tee drway pi Nawashoonikaywina keeshpin kiya keema payyek toon famee mambr kay-itouhtayw Île-à-la-Crosse L'ikol.

Ihtakwan meena kinwow weestamakaywin aykwawnima ashtayw ayiwawk weestamakaywina. Kaw-keewawpastaen daw li computer oota keema kaw-keechahaen mashinahkan ishi info@ILEXSettlement.ca keema shaywaypichikay 1-833-700-7458 chi-kawschitinamaen tawpimashnahikaywin.

KAYKWY ANIMA WIYASHWAWCHIKAYWIN OUSCHI?

Ooma wiyashwawchikaywin itwaywawn aykwawnima Kenadaw pi Saskatchewan kaw-takoowak kaw-paminahkik pi neekawnayistamouwina ooma Île-à-la-Crosse L'ikol, pi aykwawnima pikounam sa atoushkaywina chi-kenawayimawt pi kaw-kenawawiyimimouwina lee zhawn'd L'ikol ouschi mawytoutawkouwin. Ooma wiyashwawchikaywin kakwaychimayw Kenadaw pi Saskatchewan chitipahikayw en payimawn akouz ouschi oohin pikounam sa atoushkaywina chi-kenawayimawt. Oohin peekshkwaystamouwina namou kee-provee daw li kor.

Deu en bawnd di moond kaykinikawshowak didawn ooma wiyashwawchikaywin:

- kahkiyaw awiyak aykwawniki **Ishkounikan Mamouwiyawuk**: en parson aykwawna [kaw-pimawtishow ishpee Li mwawn'd Disawnbr 9, 2003](#), pi kay-itouhtayw Île-à-la-Crosse L'ikol ishi en zhawn'd ikol keema poor kishkinwahamakaywina – avek la zhournee lee zhawn'd ikol keema "la zhournee kishkinwahamakanak"; pi
- kahkiyaw awiyak aykwawniki didawn **La famee Mamouwiyawuk**: en nasasyee, en parawn, lee zawnfawn, oushishimak, keema wawkoumawkan ouschi Ishkounikan Mamouwiyawuk mambr.

Ooma wiyashwawchikaywin pikou tipaham kaykwaya kaw-kee-ishpayikihk, keema akouz ouschi, Île-à-la-Crosse L'ikol pi itaykawweekihk aykwawnima kee-paminamouwawn ashpin ouschi 1860 iskouhk 1976. Namou avek kaykwy aykwawnima kaw-ishpayik itay Rossignol L'ikol aykwawnima kaw-paminamouwawn ouschi Île-à-la-Crosse L'ikol En Bawnd, kiki kaw-keemawchistawn ishpee 1975-76.

KAYKWY ANIHI KAW-ITAYHTAKWAHK PAKITINIKAWTAYNANIWAN?

Tou lee deu kaw-pakitinikawtaynaniwan avek en payimawn poor Ishkounikan Mamouwiyawuk li mambr. Poor Ishkounikanak kaw-pimawtishow ishpee Li mwawn'd Disawnbr 9, 2003, mawka kee-nipow akwa, ooma en payimawn ichisahikawtayw ishi kawtipayhtahk keema miyikawshoowak, tapishkoot sa nasasyee keema see zawnfawn.

Kaw-kee-amistawn kahkiyaw tawpimashnahikaywin ouschi tou lee deu Pakitinikawtaynaniwan Awn nagrimawn daw li computer [oota](mailto:info@ILEXSettlement.ca) kaw-kee-ichahean la email info@ILEXSettlement.ca keema taypayhkhun 1-833-700-7458 poor tawpimashnahikaywin.

Kenadaw kee-tipayimow chitipahikayw \$27.335 milyoon poor “Kishkayistamoowin li Payimawn”. Itahtow Ishkounikan (keema kawtipayhtahk keema miyikawshoowak) chi-outistikow Kishkayistamoowin li Payimawn iyikouhk:

- \$10,000 poor Ishkounikan kay-itouhtayw L’ikol poor awn baw saenk l’ikol l’anee; or
- \$15,000 poor Ishkounikan kay-itouhtayw L’ikol poor saenk keema ayiwawk l’ikol l’anee.

Keeshpin namou ikoyikouhk l’arzhawn chitipahikayw kahkiyaw Kishkayistamoowin li Payimawn, itahtow Kishkayistamoowin li Payimawn chi-awchiwinikawtayw aykwy-ikouhk. Keeshpin ishkoupayiwawn l’arzhawn, ishkoupayiwawn ouschi awa \$27.335 milyoon chi-ichahwaw ishi Nakatamakaywin aen Tawd d’arzhawn.

Ooma Nakatamakaywin aen Tawd d’arzhawn aykwawna chi-awpachihaw poor nakatoohkataywina aykwawnima awnkourazhee kakeekayhk, miywayawin, weechiwawhkoostouwin, kishkinwahamakaywin, Indigene la lawngaezh mawachistawin, pi/keema kishkishouwin poor Ishkounikanak, see famee pi li alawntour. Kenadaw chi-tipahikayw \$10 milyoon ishi Nakatamakaywin aen Tawd d’arzhawn (meena pikou iyikouhk ishkoupayiwawn l’arzhawn ouschi Kishkayistamoowin li Payimawn d’arzhawn).

Ooma pakitinikawtaynaniwan meena avek ishkuhk \$5 milyoon poor tipahikaywina ouschi paminamoowin pi \$5 milyoon poor aen tawd d’arzhawn pikou iyikouhk ahkamay li lway pakwatem Saskatchewan (keeshpin pikou pakitinikawtaynaniwan avek Saskatchewan si aykwanwima pakitinikawtaynaniwan ouschi li zheuzh pi wiyashwawchikaywin poonistawn.)

Ooma li koor tipahikipayihawina chi-tipahaminaniwawn ouschi Kenadaw aykwawni \$8.5 milyoon avek HST, pi namou outinikawtayw ouschi Kishkayistamoowin li Payimawn keema Nakatamakaywin aen Tawd d’arzhawn. Awa li wakaw marwshihkayw li koor tipahikipayihawina pahkawn ouschi pakitinikawtaynaniwan avek Kenadaw, pi Kenadaw chitipahikayw aykwawnima pahkawn.

Saskatchewan kee-tipayimow chitipahikayw \$40.2 milyoon chi-settee wiyashwawchikaywin pakwatem aykwawnima. Ooma pakitinikawtaynaniwan l’arzhawn kaw-itayimouhk chi-natakouhkawtayw oohin li veu ouschi kaw-natoutamouwawn anawawn ouschi mamouwiyawuk wiyashwawchikaywin: rawr kishkayistamoowin; paykounouhk kichimahiwaywin; nakatamakaywin kakeekayhk, miywayawin, kishkinwahamakaywin, la lawngaezh, kee-ishopimawchihounawniwun pi kishkishouwin; pi li koor

tipahikipayihawina pi pakitinikawtaynaniwan paminamoowin tipahikaywina. Ooki atawmimaywak itayhtamwak aykwawnima \$40.2 milyoon pahkwaynaw kaw-ishi pimitashahikawtayk:

- neekawn, chitipahikayw en payimawn ishi lee zhawn’d ikol aykwawniki kakwawtakishtaw siirieu kichimahiwaywin keema ahkwatishiwinn kichimahiwaywin itay Île-à-la-Crosse L’ikol, ikoyikouhk ouschi \$50,000 ishkuhk \$235,000 ashpayimouwawn ishi makouhtawin ouschi kichimahiwaywin pi iyikouhk kaw-kakwawtakihahk
- keestwawm, mooshkinastowin Kishkayistamoowin li Payimawn pikou poor itay kawweekihk lee zhawn’d ikol/Ishkounikanak kaw-kapeeshichik daw L’ikol itaykawweekihk; pi
- chitipahikayw li koor tipahikipayihawina iyikouhk \$8.5 milyoon.

Tawmuykouhk ouschi Kishkayistamoowin li Payimawn mooshkinastowin, keeshpin pikou iyikouhk, chi-ashpayimouwawn tawmuykouhk tipahikaniwawn ishi kichimahiwaywin natoutamouwawn pi pakitinikawtaynaniwan paminamoowin tipahikaywina.

Itayimiwawn aykwawnima \$1 milyoon chinitawayistakwan poor ayiwawk tipahikaywina ouschi paminamouwinn ooma pakitinikawtaynaniwan, kiko chitipahikawtayw ouschi pakitinikawtaynaniwan l’arzhawn. Ooma li koor tipahikipayihawina ashaynamouwawn ouschi pakitinikawtaynaniwan l’arzhawn, akouz ooma pakitinikawtaynaniwan si aykwawnima “kaw-takwashtawhk” (namou tapishkoot pakitinikawtaynaniwan avek Kenadaw).

KAYKWY AKWA KEESTWAWM ISHPAYIN?

Ishpee **Li mwaw’d Mawr 30-31, 2026**, chi-ihakwan kakwaychihkaymoowin itay la Kor’d Oushouhkatishiwinn Li rway’d Omiyikoushiwin didawn Saskatoon, akouta li zheuzh chi-itayistam keeshpin keemiyayhtem payyek keema tou lee deu ouschi kaw-itayhtakwahk pakitinikawtaynaniwan. Ooma en test poor miyayhtemouwinn pakitinikawtaynaniwan keeshpin aykwawnima fayr, rizanaeb, pi ishi miyo-ouhtishouwin ouschi Ishkounikan pi La famee Mamouwiyawuk.

Awa li zheuzh meena chi-itayistam keeshpin keemiyayhtem li koor tipahikipayihawina kaw-natoutamouwawn ouschi atawmimaywak sa wakaw (ooki li wakaw kee-atoushkayw ishi nakatouhkaywin pour wiyawow Ishkounikanak pi see famee). Tipahikipayihawinn kaw-natoutamawinn si aykwawnima:

- \$8.5 milyoon avek li tax, chi-tipahaminaniwawn Kenadaw, pahkawn ouschi pakitinikawtaynaniwan l’arzhawn; pi
- \$8.5 milyoon, chi-tipahaminaniwawn Saskatchewan, aykwawnima ouschi \$40.2 milyoon pakitinikawtaynaniwan d’arzhawn.

Ishkounikanak pi see famee mambr namou katawt chitipahikayw pikou iyikouhk l’arzhawn poor li koor tipahikipayihawina. Namou katawt meena chi-

mashinahikayhawt li wakaw poor natoutamouwawn keema chi-outistikow en payimawn.

Atawmimaywak see wakaw chi-natoutaem meena poor kishpinawmawkoushiwin awn payimawn iyikouhk ouschi \$10,000, chi-tipahikawtayk ishi itahtow atawmimaywak pi awtist li mambr ouschi Île-à-la-Crosse Kishkinouhtahway En bawnd, poor nishtawinamouwin sa shoukathoukaywin didawn ooma nakatouhkaywin. Oohin kishpinawmawkoushiwina kee-marwshihkaywawn avek Kenadaw pahkawn pi chitipahikawtayw pahkawn ouschi pakitinikawtaynaniwan l'arzhawn.

KAYKWY ANIHI ME DRWAY PI NAWASHOONIKAYWINA?

Keeshpin kiya kinouhtay peekishkwawtaw awiyek chikishkayistamin ayiwawk ouschi kaw-itayhtakwahk pakitinikawtaynaniwan, kawschitininik atawmimaywak sa wakaw kaw-awpachistahk weehstamakaywin awn baw li paez.

Chi-kayschinahouyin kaw-outistikouhk ayiwawk weehstamakaywin ouschi tawnsheeshi chinatoutamaen poor en payimawn keeshpin awa li zheuzh keemiyayhtem pakitinikawtaynaniwan(a), maenkihk kikawschinatouwin weehstamakaywin ishi atawmimaywak sa wakaw keema ishi paminikayw, Deloitte.

1. Nama kaykway itouta

Keeshpin kiya kitipayimoun avek kaw-itayhtakwahk pakitinikawtaynaniwan pi li koor tipahikipayihawina kaw-natoutamouwawn ouschi atawmimaywak sa wakaw, pi kishpinawmawkoushiwina natoutamawina, nama kaykway chi-itoutamaen maykwawt.

2. Muwnayshkakay

Keeshpin kiya namou kitipayimoun avek iyikouhk kaw-itayhtakwahk pakitinikawtaynaniwan avek Kenadaw keema avek Saskatchewan, keema tawmuykouhk li

koor tipahikipayihawina kaw-natoutamouwawn ouschi atawmimaywak sa wakaw, keema kishpinawmawkoushiwina natoutamawina, pi namou kinitawayistaen li zheuzh chi-miyayhtem, kaw-kee-ichahaen muwnayshkamouwin. Awa li zheuzh chi-amistaw kahkiyaw muwnayshkamouwina pi chitayistam en pawr sa itayimouwin.

Chi-ichahamaen muwnayshkamouwin, kaw-kee-ichisahaen Muwnayshkamouwin Mashinahikan avawn Li mwaw'd Mawr 29, 2026. Mashinahikan pi zaenstriksyoon poor ichahamouwin daw li computer oota, kaw-kee-ichahean la email info@ILEXSettlement.ca keema taypwayhkun 1-833-700-7458 poor tawpimashnahikaywin.

3. Wawpasta keema takoow kakwaychihkaymoowin

Keeshpin kiya kinoutay wawpastaen ooma pakitinikawtaynaniwan nagrimawn kakwaychihkaymoowin, kaw-kee-wawpastaen en parson itay li koor maezoun oota 520 Spadina Cres E, Saskatoon, ishpee **Li mwaw'd Mawr 30-31, 2026, mawchistawn 10 a.m.**.. Kaw-kee-wawpastaen meena daw li computer.

Ishkounikanak keema La famee Mamouwiyawuk li mambr kaw-nouhtay peekishkwaychik kayschiwawk ishi li zheuzh ouschi oohin kaw-pakitinikawtaynaniwan keema atawmimaywak sa wakaw li koor tipahikipayihawina natoutamawin, keema kishpinawmawkoushiwina natoutamawina, chikkee itouhtaywak daw li koor keema en parson daw li computer.

Chi-kawschitinamaen shakamouhtawin chi-wawpastamaen keema chi-peekishwayin avek li zheus li computer, wapaynikay oota keema ichaha la email info@ILEXSettlement.ca keema taypwayhkun 1-833-700-7458 apray Li mwaw'd Mawr 24, 2026.

POOR AYIWAWK WEEHSTAMAKAYWIN

Poor ayiwawk weehstamakaywin ouschi kaw-itayhtakwahk pakitinikawtaynaniwan, keekay ooma paminikayw sa achimoushtawakaywin daw li computer oota keema ichaha la email info@ILEXSettlement.ca keema taypwayhkun 1-833-700-7458. Keeshpin kinouhtay peekishkwawtaw li wakaw, atawmimaywak li wakaw chikkee meena maenkiw ayiwawk weehstamakaywin. Namou kitipahikaw poor peekishkwaywin avek wiyawow ouschi mamouwiyawuk wiyashwawchikaywin keema kaw-itayhtakwahk pakitinikawtaynaniwan.

Sotos LLP

55 University Ave, Suite 600
Toronto, ON M5J 2H7
namaya@sotos.ca
1-888-684-5545 (toll-free)

Goldblatt Partners LLP

20 Dundas St. W., Suite 1039
Toronto, ON M5G 2C2
esmith@goldblattpartners.com
1-855-214-7557 (toll-free)

Merchant Law Group LLP

2401 Saskatchewan Dr., Suite 100
Regina, SK S4P 4H8
ilex@merchantlaw.com
306-271-2896